

Na osnovu člana IV.B.7.a)(IV) Ustava Federacije Bosne i Hercegovine, donosim

UKAZ

O PROGLAŠENJU ZAKONA O IZMJENAMA I DOPUNAMA ZAKONA O POLJOPRIVREDI

Proglašava se Zakon o izmjenama i dopunama Zakona o poljoprivredi koji je donio Parlament Federacije BiH na sjednici Predstavničkog doma od 28. oktobra 2009. godine i na sjednici Doma naroda od 3. decembra 2009. godine.

Broj 01-02-29/10
22. januara 2010. godine
Sarajevo

Predsjednica
Borjana Krišto, s. r.

ZAKON

O IZMJENAMA I DOPUNAMA ZAKONA O POLJOPRIVREDI

Član 1.

U Zakonu o poljoprivredi ("Službene novine Federacije BiH", broj 88/07), član 28. mijenja se i glasi:

"Mjere novčanih podrški u poljoprivredi su poticajna sredstva iz Budžeta Federacije Bosne i Hercegovine koja obuhvataju poticaje proizvodnji i plaćanja u sklopu mjera strukturne politike.

Mjere podrški proizvodnji provode se kroz model poticaja proizvodnji, a plaćanja u sklopu mjera strukturne politike provode se kroz model podrške dohotku, model kapitalnih ulaganja, model ruralnog razvoja i model ostalih strukturnih podrški.

Mjere novčanih podrški u poljoprivredi provode se u skladu sa Strategijom poljoprivrede i ovim zakonom, do iznosa sredstava planiranih budžetom za te namjene za određenu fiskalnu godinu.

Prioriteti, struktura ulaganja po pojedinim modelima iz stava 2. ovog člana i uvjeti koje moraju ispunjavati poljoprivredna gazdinstva da bi ostvarila podršku utvrdit će se Zakonom o novčanoj podršci u poljoprivredi i ruralnom razvoju Federacije BiH odnosno zakonima o novčanim podrškama u kantonima".

Član 2.

Član 29. st. 4., 5., 6. i 7. mijenjaju se i glase:

"Korisnik-klijent dužan je vratiti novčana sredstva dobivena na osnovu netačnih podataka i/ili ako dobivena sredstva nenamjenski utroši zajedno sa zateznim kamatama u visini koja je zakonom propisana u roku od 30

dana od dana donošenja rješenja kojim je utvrđeno postojanje netačnih podataka ili nenamjensko trošenje dobivenih novčanih sredstava.

U slučaju iz stava 4. ovog člana, korisnik-klijent može podnijeti novi zahtjev za sticanje prava iz stava 1. ovog člana po isteku tri godine računajući od dana povrata novčanih sredstava uključujući zakonske zatezne kamate u cjelini, a na osnovu rješenja kojim je federalni ministar poljoprivrede ili poljoprivredni inspektor naredio korisniku-klijentu prava povrat sredstava.

Korisnici-klijenti moraju čuvati dokumentaciju na osnovu koje su ostvarili novčana sredstva najmanje tri godine računajući od dana dobivanja sredstava.

Svi korisnici-klijenti koji podnose zahtjeve za novčane podrške moraju biti upisani u registre iz čl. 46. i 49. ovog zakona".

Član 3.

U članu 36. stav 3., iza alineje 4. dodaje se nova alineja koja glasi:

"- izdaje, produžava i oduzima odobrenje za samostalan rad svojih članova (licenca)".

Dosadašnje alineje 5., 6., 7. i 8. postaju alineje 6., 7., 8. i 9.

Član 4.

U članu 37. dodaje se novi stav 3. koji glasi:

"Poslovi Agronomske komore iz člana 36. stav 3. alineja druga smatraju se javnim ovlaštenjima.

Član 5.

U članu 43. u stavu 2. iza tačke 2. dodaje se nova tačka 3. koja glasi:

"3. prati izradu i provođenje strategije ruralnog razvoja i štiti i profilira interese ruralnih zajednica u Federaciji Bosne i Hercegovine".

Dosadašnja tačka 3. postaje tačka 4.

Član 6.

Iza člana 44. dodaje se novi član 44a. koji glasi:

"Član 44a.

Radi stvaranja povoljnijeg ambijenta za investiranje u poljoprivredu, prehranu i ruralnom razvoju, Vlada Federacije BiH osniva garantni fond Federacije Bosne i Hercegovine (u daljnjem tekstu: Garantni fond).

Garantni fond olakšava pokretanje investicija poljoprivrednim gazdinstvima (pravnim i fizičkim licima) u poljoprivredu, prehranu i ruralnom razvoju izdavanjem garancija na ime osiguranja cijelog kredita ili dijela kredita koji Razvojna banka Federacije Bosne i Hercegovine i druge finansijske organizacije u Federaciji BiH odobravaju poljoprivrednim gazdinstvima.

Djelatnost, organizacija, zadaci i način finansiranja Garantnog fonda, utvrdit će se posebnim zakonom."

Član 7.

Naslov i član 46. mijenjaju se i glase:

"Registar poljoprivrednih gazdinstava i Registar klijenata

Federalno ministarstvo poljoprivrede, vodoprivrede i šumarstva je dužno obezbijediti tehničko provođenje i funkcionisanje Registra poljoprivrednih gazdinstava i Registra klijenata u Federaciji BiH kao i harmonizaciju i integraciju registara na državnom nivou u skladu s Odlukom o harmonizovanim registrima poljoprivrednih gazdinstava i harmonizovanim registrima klijenata BiH ("Službeni glasnik BiH", broj 85/07) te pristup podacima iz registra u Federaciji BiH, Ministarstvu spoljne trgovine i ekonomskih odnosa Bosne i Hercegovine.

Zahtjev za upis, promjenu ili brisanje podataka iz registra se podnosi nadležnoj općinskoj službi prema sjedištu privrednog društva, zadruga ili drugog pravnog lica i obrtnika, odnosno mjestu prebivališta nosioca porodičnog poljoprivrednog gazdinstva ili prebivališta drugog fizičkog lica, nezavisno od mjesta obavljanja poljoprivredne djelatnosti u Bosni i Hercegovini.

Podaci iz registra vode se u bazi podataka na elektronski način i obavezno se koriste za provođenje, kontrolu i usklađivanje sistema upravljanja mjerama podrške za poljoprivredu i ruralni razvoj radi podsticaja razvoja poljoprivredne proizvodnje i ruralnih područja kao i za potrebe vođenja analitike i poljoprivredne statistike na teritoriji Federacije BiH.

Pristup podacima iz registra obezbjeđuje se i kantonalnim ministarstvima nadležnim za poslove poljoprivrede, za podatke sa područja svog kantona.

Propis o uslovima, načinu upisa, obrascima, vođenju i brisanju podataka iz registra poljoprivrednih gazdinstava i registra klijenata donosi federalni ministar poljoprivrede, vodoprivrede i šumarstva.

Propis iz stava 5. ovog člana mora biti usaglašen s Odlukom o harmonizovanim registrima poljoprivrednih gazdinstava i harmonizovanim registrima klijenata u BiH."

Član 8.

U članu 47. dodaje se naslov člana i glasi:

"Upis u Registar poljoprivrednih gazdinstava"

Član 9.

Član 49. mijenja se i glasi:

"Klijentima, u smislu ovog zakona, smatraju se fizička i pravna lica koja žele da ostvare pravo na podrške u poljoprivredi i ruralnom razvoju na teritoriji Federacije BiH i koja se kao takva upisuju u Registar klijenata.

U Registar klijenata mogu se upisati i pravna i fizička lica koja nisu upisana u Registar poljoprivrednih gazdinstava jer ne obrađuju zemljište ili nemaju stoku, ali imaju pravo na određene mjere podrške za poljoprivredu i ruralni razvoj.

Pravo na podrške u poljoprivredi i ruralnom razvoju mogu ostvariti samo lica koja su upisana u Registar klijenata.

Podaci iz Registra klijenata koriste za potrebe obezbjeđenja kontaktnih informacija u vezi sa isplatom novčanih podrški u oblasti poljoprivrede i ruralnog razvoja."

Član 10.

Ovaj zakon stupa na snagu osmog dana od dana objavljivanja u "Službenim novinama Federacije BiH".

Predsjedavajući
Doma naroda
Parlamenta Federacije BiH
Stjepan Krešić, s. r.

Predsjedavajući
Predstavničkog doma
Parlamenta Federacije BiH
Safet Softić, s. r.